

**Ngu jo cjua xi chja
xujun changá tsëhë Nina V**

**Historias del Antiguo Testamento V
Levítico 16 - Números 31**




en el mazateco de Chiquihuitlán de Juárez

**Ngu jo cjua xi chja
xujun changá tsëhë Nina V**

Historias del Antiguo Testamento V

Levítico 16 - Números 31



**Las ilustraciones en las páginas 25, 27, y 38 a 48 son propiedad de la Fundación
David C. Cook, usadas con permiso.**

Primera edición
Historias del Antiguo Testamento V
en el mazateco de Chiquihuitlán de Juárez
México, D. F. .6C
Diciembre de 1993

Historias del Antiguo Testamento V

**Cachja Nina cojo Moisés hacutjin sahmi me suhi rë
nixtin jyë xi meje rë xi sahmi xuta tjë rë Israel**

(Levítico 16; 23; Números 28:16-29:40)

Cachja Nina cojo Moisés xi meje rë xi tsinguitsjen me xuta xi meje rë xi cjuahajenda me nixtin xi vijnetaha totje. Xa xi tjin rë me ne, sahmi me cahntsua xi jyun nixtin. Hane nixtin xi chjahajenda rë ne, meje rë xi cumatangun me hiscan xi tu cuiseen ni tsëhë yungun tsjian rë Nina xi cjuaharcu me Nina.

Suhi xi tjun cuechu xi ngu nu xatsë ne, hacui suhi tsëhë pascua. Nixtin teñuju tsëhë sa xi tjun tsëhë nu rë me ne, hya má suhi vëhë. Cuma suhi vëhë cojo sa xi tsinguitsjen xuta hacutjin cavaxë Nina me

Esta ilustración
no está
disponible.

tséhë Egipto. Suhi vëhë xi cuma nixtin teñuju, sehe nixtin tyjuhun hisca cuechutaha rë nixtin can ngu tséhë sa, hya má suhi xi hmí rë “nixtin xi chinë rë niñu xi tsajin san rë”. Hya xi tijima suhi xi cuacun vë ne, nixtin tyjuhun cojo nixtin can ngu má nixtin chjahajenda rë tangun sacuaha nixtin xi cuijnetaha totje. Xi cumá suhi xi jinë xuta niñu xi tsajin sa rë ne, yëjë ni xuta ne, nchunchujunni cuma tangun me xi tsiquehen nahmi chu xi sua xuta cjuatjo cojo Nina. Nchunchujun ni tsiquehen me jo hndindyaja cojo ngu chu tsángä yehe cojo yatu chu tsángä xi tjin ru ngu nu hane sua me chu sacuaha cjuatjo xi tjinchihin. Hane nchunchujun ni cojo jima ngu chu xi cuacun vëhë ne, hacuaha sua me cjuatjo rë scua rë trigu. Hacuaha nchunchujun ni catitsquehen me ngu chu tentsun tséhë jyê rë xuta.

Hacuaha cahntsua totje xi jinë me niñu xi tsajin san rë ne, hya sahmi me suhi xi hmi rë “suhi tséhë tutjë xi tjun catunihnga rë”. Xi ha cavatju nixtin xi chjahajenda rë tséhë totje jan ne, hane camanchujun ni ne, yëjë xuta ne, cjuaha me xtë rë tutjë xi tjun tjun casahmi me nu vëhë, sehe cjuecani me xi cjuahatsja nahmi sacuaha cjuatjo xi sua rë xuta Nina. Hacuaha cjuecani me ngu chu tsángä

sacuaha ngu cjuatjo xi tjinchihin, cojo ngu cjuatjo tsëhë scuan rë pan cojo hitsë vinu. Cumajin sinë me tsëhë tutjë xatsë jan, hacuaha cumajin sahmi me niñu cojo hisca xi camá quijicani me tsëhë xi cumá tsëhë Nina. (Hya xi hincha ndiya me xi cjue me nangui Canaán ne, camajin casua me cjuatjo vëhë tsëhë xi tsajin nangui xi catsitjë me; peru cuatjin casua Nina me suhi vëhë cojo sa xi cuatjin sahmi me hya xi ha siutaha me ngajan Canaán.)

Xi ha tjin yachan të nixtin xi cavatju nixtin tjun tsëhë suhi tsëhë tutjë xi tjun tjun ne, hya má suhi xi hmi rë Pentecostés. Xi cumá suhi vëhë ne, jima ngu xuta tjë rë Israel ne, sua me cojo Nina ngu cjuatjo tsëhë xitjë xi tsëhë nu vëhë. Hacuaha tsiquehen nahmi yatu chu tsángä langa xi ngu nu, ngu chu ndyaja, cojo jo chu tsángä yehe sacuaha ngu cjuatjo xi tjinchihin; hane ngu chu tentsun tsiquehen me xi cuma sacuaha ngu cjuatjo tsëhë jyê rë me. Hane jo nga chu tsángä langa xi ngu nu ne, cuma sacuaha ngu cjuatjo xi sinë tangun me. Nixtin vëhë ne, hacui nixtin xi chjahajenda rë tangun ni sacuaha chjahajenda rë nixtin xi vijnetaha totje. Sacuaha tsëhë xitjë rë xuta ne, hacuaha cachja Nina cojo xuta jan xi hya xi scunihnga me tutjë rë me ne, hacuiin chichihin cjuaha me ta meje rë xi cuangui

hitsë cojo sa xi xuta yuma ne, cuma cjue jaha me tsëhë. Hacuaha sá xi cuinengui hya xi cjuaha me ne, miji rë xi scunitjehnga me. Meje rë xi tsingaquijñi me hitsë tutjë jan nangui rë me, cojo sa xi xuta yuma xi tsajin nangui rë me ne, cjue jaha me.

Nixtin ngu tsëhë sa xi má yatu ne, hya má suhi xi hmi rë suhi tsëhë tyjo. Hacuaha chjahajenda rë nixtin vë. Cumatangun yëjë ni xuta ngajan yungun tsjian rë Nina hane tsiquehen me chu xi sua me cjuatjo cojo Nina. Chu xi tsiquehen me ne, chu vihi: ngu chu hndindyaja cojo ngu chu tsángä jyë cojo yatu chu tsángä langa xi tjin rë ngu nu. Chu vëhë cueya chu sacuaha ngu cjuatjo xi tjinchihin. Jimangu chu jan ne, hacuaha cjuecojo ngu cjuatjo tsëhë scuan rë trigu. Hacuaha nixtin hya ne, cueya ngu chu tentsun sacuaha cjuatjo tsëhë jyë rë xuta.


Sehe nixtin të tsëhë sa xi má yatu jan ne, hya má suhi xi hmi rë nixtin xi cjuë cjuachan xi tjin cojo Nina. Jemu jyë suhi vëhë. Hyä ne, cuichja xuta tjë rë Israel cojo Nina xi jercu choho má rë me tsëhë xi choho casahmi me cahntsua ngu nu vëhë, sehe cjuehya me xi tsinchataha Nina me. Suhi jyë vëhë ne, hacuaha chjahajenda rë

sacuaha nixtin xi vijnetaha totje. Suhi hya ne, jemu tjin xa xi satë rë nahmi cahntsua ndava tsjian rë Nina ta cjuehya rë me Nina cjuaninchataha tsöhë yëjë cjuatsehen xi casahmi xuta tjë rë Israel cahntsua nu vëhë. Ngu tutu ni nixtin vëhë cuma cuisehen nahmi xi matitjun cahntsua cuartu rë ndava tsjian rë Nina hiscan tacun caxa ximinchacun. Ngajan cuisehen me cuartu xi tacun taha ngaxtun cortina hiscan ndava Nina hiscan xi matsejen suva Nina ngajñi yufi xcun caxa jan. Ngu tutu ni nahmi xi matitjun ma visehen me ngajan nixtin hya; peru jemu tsavi xi sahmi me tu cun tjin cavitexa Nina xi sahmi me ta, sa tsajin ne, cueya me.

Cuitjin cachja Nina xi sahmi me: nixtin hya ne, nahmi xi matitjun ne, cuinduya me sehe cuaja me ngu tsjian tyava xi tsjian ndaja camá. Xi cjue me yungun tsjian ne, cjuecojo me ngu hndindyaja sacuaha cjuatjo tsöhë jyê rë me cojo tsöhë yëjë sa nahmi, hacuaha cjuecojo me ngu chu tsángga sacuaha cjuatjo tjinchihin tsöhë suva me cojo tsöhë yëjë sa nahmi. Hacuaha cjuecojo me jo chu tentsun xi cuma ngatsë rë jyê rë yëjë xuta tjë rë Israel cojo ngu chu tsángga tsöhë ngu cjuatjo xi tjinchihin xi tsöhë xuta. Hane sacuaha jo chu tentsun jan ne, sehe cuaxë me ngu suerte xi cuaxijin me chu xi

cueya chu sacuaha ngu cjuatjo tsëhë jyê rë xuta. Peru chu xingu jan ne, cuetjutje chu cuejña ndaya chu cojo sa xi cuanga chu ngajan nguijña.

Titjun ne, tsiquehen me chu ndyaja hane hya xi camá cati chu xi ma cjuatjo rë nahmi ne, cjuaha nahmi ndixuhi xi yaha rë ndihi tsëhë ngasunscun hane cuincha me cahntsua quicha rë tyjungunsa.
Hacuaha cjuaha me ngu xtin tyjungunsa xi cuaca me xcun ndixuhi



Esta ilustración
no está
disponible.

jan jinguyëjë rë xi sahmi me xa cahntsua yungun tsjian rë Nina. Xi cuisehen me ngajan cahntsua ne, cuitejnu me jni rë chu ndyaja jan tyavaxcun caxa ximinchacun. Sehe cuetju me ndatsen yungun hane tsiquehen me chu tentsun tsëhë jyë rë xuta. Hya xi camá ne, sehe cuya cuisehen nga me cojo tyjungunsa jan hacuaha cojo jni rë chu tentsun, hane cuitejnu me jni rë chu jan cuartu ximinchacun ndava Nina. Hacuaha cuitejnu me jni jan xcun ngasunscun jyë xi tacun ngajan ndatsen rë ndava Nina. Ngaxtun vëhë ne, cuisanetsja me rcu chu tentsun xi quicun jan sacuaha xi cuincha me jyë rë me xcun chu, hane cuichjasun me xcusun tsehen xi casahmi xuta tjë rë Israel cahntsua nu vëhë. Hya xi camá ne, ngu xuta jan ne, scunda me chu tentsun quicun jan xi cuanga chu nguijña. Cuma cuinújan xi yëjë xcusun tsehen xi casahmi xuta tjë rë Israel cahntsua nu vëhë ne, chu tentsun jan cavisehen rë chu jyë vëhë, sehe quijicojo cjin chu.

Hya xi camá ne, nahmi xi matitjun jan ne, cuaxë me tsjian ndajyih tyava rë me hane cuaja me tsjian xcusun rë me xi hatuxa vaja me yëjë nixtin hya xi sahmi me xa rë Nina ngajan yungun tsjian. Sehe cuetju me ndatsen yungun jan hane tsinguijnetaha me sua me cjuatjo xi sua xuta jan cojo Nina. Tjin rë me xi cuaca me

ngu jingu camaha ni chu xi sua xuta ngajan xcun ngasunscun jyë jan sacuaha ngu cjuatjo xi tjinchihin, cuaca me cojo xine rë chu xi casua xuta cjuatjo tsëhë jyë rë me jan. Sehe cjue ngu xuta cojo yojo xi cavangui tsëhë cjuatjo jan ngajan cjin camaha ni tsëhë ndihya tsjian rë xuta. Hane ngajan cjin ne, cuaca me yëjë. Nixtin hya ne, xuta tjë rë Israel ne, hacuaha tsiquehen me ngu hndindyaja cojo ngu chu tsánga jyë cojo yatu chu tsánga langa xi tjin rë ngu nu sacuaha ngu cjuatjo xi tjinchihin. Jima ngu chu ne, hacuaha cojo ngu cjuatjo tsëhë trigu cumatangun cojo chu. Hacuaha tsiquehen me ngu sa chu tentsun sacuaha ngu cjuatjo tsëhë jyë rë me.

Nixtin tjun tsëhë sa xi ma yatu jan ne, hya cuetsihin suhi xi hmi rë suhi tsëhë ndihya xca. Nixtin xi tjun tjun jan cojo nixtin xi ma jyin jan ne, nixtin xi cuacun vë ne, hacuaha nixtin xi chjahajenda rë. Hane nixtin hya ne, yëjë xuta tjë rë Israel ne, tjin rë me xi cumatangun me ngajan yungun rë Nina. Hya xi cuetsihin suhi ne, yëjë xuta ne, tjin rë me xi tsindaja me ndihya xca hiscan xi cuiyuju me cahntsua ngu totje. Hane xi cuatjin sahmi me ne, xcusun vëhë ne, visecoo sua machaya rë me hacutjin caviyuju me hya xi hincha ndiya me xi cjui me nangui Canaán xi cavetju me nangui Egipto.

Jemu ngu suhi cjuasua camahani suhi vëhë, ta ngu suhi xi hacuaha casua me nacuechji rë Nina tsëhë xitjë cojo tsëhë yëjë cjuandaja xi casahmi Nina cojo rë me. Yëjë xuta tjë rë Israel ne, hacuaha tjin rë me xi tsiquehen me chu xi sua me cjuatjo cojo Nina nixtin hya, sacuaha ngu cjuatjo xi tjinchihin cojo ngu cjuatjo tsëhë jyë rë me.

Choho cachja ngu cha jan tsëhë Nina, hane camá cha castigu

(Levítico 24:10-23)

Ngajñi xuta xi hincha ndiya me ne, tacun ngu cha quihndi rë ngu cha egipto hane naa rë cha ne, na tjë rë Israel má na. Hane cha quihndi xi cuajyahi vë ne, cacjan cha cojo jingu sa cha, hane ngajñi cjuacjan rë cha ne, choho cachja cha tsëhë Nina. Ngajan xi Nina ne, cachja me cojo Moisés cuitjin:

—Tihincueje cha xi cuajyahi vë ngajan xin camaha ni tsëhë ndihya tsjian nuju. Hacuaha yëjë xuta xi cahndë me cjua xi cachja cha ne, tihin cojo rë me. Xi cuechun ngajan ne, xuta xi cahndë cjua xi cachja cha ne, catisanetsja me rcu cha. Xi cjuë ne, sehe catetaha

me cha ndyojo hisca xi tsiquehen me cha. Cuatjin meje rë xi nihñu cojo tu yo ni xuta xi choho cuichja me tsahan. —Cuatjin cachja Nina cojo Moisés.


Hane cuatjin jain casahmi me.

Ley tsëhë cjuacjintacun tsëhë nangui cojo tsëhë ndihya

(Levítico 25)

Cavitexa Nina Moisés xi cuicuya me xuta tjë rë Israel xi sacuanitjin ni tjin nixtin xi fahajenda me suva me ne, hacuaha cuanitjin ni meje rë xi sua me cahndë cjuahajenda nangui rë me xi sehe sacu rë me. Jyun nu sahmixa me cojo peru xi má yatu nu jan ne, sua me cahndë cjuahajenda nangui rë me. Nu vëhë ne, cumajin cuincha me tjë, cumajin cjuane me nangui rë me. Cumajin cuatësun me ngu ya, hacuaha cumajin scunihnga me xitjë xi camá nu vëhë. Xuta yuma cojo xuta ngu nangui ni ne, me vëhë cuma cuisehen me xcun nangui jan cahntsua xingu nu vëhë hane scunihnga me tutjë xi cavetju suva jan. Hacuaha cojo chu nguijña ne, sacu sinë chu ngajan. Nai rë nangui jan ne, hacuaha cuma cjue cjuaya me hitsë xi

cavetju suva jan; peru cjuaya me chuva xi ha ngutjen sinë ni me, ta cjuayaain me xi cuinchandaja me.



Esta ilustración
no está
disponible.

Xi camá yachan tē nu, o sá xi hya xi ha cavatju camá yatu ndiya nu xi cjuahajenda nangui ne, cuma ngu suhi xi chjahajeya rē xi cjuecani rē ngu nu. Suhi jan ne, nu xi nihñña jyë nihñña hnga Nina o sa nu Jubileo hmi rē. Nu hya ne, xuta tjë rē Israel ne, cumajin sahmi me xa nguijña. Hacuaha tjin ley xi suva tséhë nixtin rē nu vëhë meje rē xi cuetaharcu me. Nu vëhë ne, sacuaha nangui xi caviteña ngu xuta tjë rē Israel cojo jingu sa me ne, cuya cumá tséhë nai tjun rē.

Hane xi cuatjin ne, chuva yachan tē nu ne, yējē nangui ne, cuya cuma tsēhē ndava xuta xi tjun cafahatsja me hya xi tjun caticja nangui Canaán xi cafaha tejo ndihya xuta tjē rē Israel jan. Sacuaha ley vēhē ne, satē rē cuitexa rē yējē xuta tsēhē nandya langa ta hacuaha cuatjin sahmi me cojo nangui rē me hane hacuaha cuatjin sahmi me cojo ndava me. Peru satin rē ley vēhē cojo ndihya xi siu cahntsua ciudad xi hnchua casexo rē. Ngu nga ley xi meje rē xi cuetaharcu xuta tjē rē Israel nu vēhē ne, chja xi sá xi tu jarē ni xuta tjē rē Israel cama caxteña me sacuaha mosu hndixahan ngatsē rē xi jemu yuma me ne, nu jan ne, cumandaya me.

**Casuacuenda Nina Moisés chuva rē xi sua xuta cjuatjo
hya xi sahmichihin me ngu cjua xi cavejña me
cojo Nina**

(Levítico 27)

Ñuju xcusun má xi cuma sua xuta hya xi vejña me xi sua me ngu cjuatjo xi sahmichihin me ngu cjua cojo Nina. Cjuatjo jan ne, cuma sua me xuta, o cuma sua me ngu chu, o cuma sua me ngu

ndihya, o cuma sua me ngu nangui. Cuma sua me ngu xuta, peru sá xi sua me xuta xi cumá tséhë Nina ne, hacuiin xuta xi cjuaquixi xi sua ne, ta sua me tujún cojo nahmi. Tjin cjua tséhë ha cjín tujún sua me ta chjí rë vëhë ne, sahmi cuenda rë nu rë xuta hacuaha sahmi cuenda sá xi chjuun o sá xi xihin xuta jan. Xi má jo ne, cuma sua me ngu chu, hane sá xi sua me ngu chu xi cumá tséhë Nina ne, sahmi cuenda rë me mé xcusun má chu. Sá xi ngu xcusun chu xi cachja Nina xi machjirëhë chu tséhë ngu cjuatjo ne, meje rë xi tsiquehen me chu sehe sua me chu cjuatjo cojo Nina. Peru sa xi hacjahi xcusun chu sua me ne, meje rë xi cuiteña me chu sehe sua me tujún xi cafahatsja me tséhë chu. Tujún jan ne, cjuahatsja nahmi. O sá xi meje rë nai rë chu chu ne, cuechji me sacuatjin chji rë chu cojo nahmi. Peru sá xi cuatsë suva me chu ne, cuesuntaha sa me chji rë chu xi sua me, sehe cuma cuejña me cojo chu jan. Xi ma jyan ne, cuma sua me ngu ndihya. Hane sá xi meje sua me ngu ndihya cojo Nina ne, cuma cuiteña me ndihya hane sehe sua me tujún tséhë chji rë ndihya jan cjuahatsja nahmi. O sa tsajin ne, cuma cuechji me cojo nahmi hacutjin vengui chji rë ndihya jan, peru cuesuntaha sa me chji rë ndihya jan xi sua me sehe cuma cuejña tséhë me ndihya. Xi má ñuju ne, cuma sua me nangui. Hane sa xi

meje sua me ngu rqui nangui rë me cojo Nina ne, ngajan xi meje rë xi nahmi sahmicuenda me hacutjin vengui chji rë nangui vëhë. Hane xi sahmicuenda me hacutjin vengui chji rë ne, hacuaha sahmicuenda me há cjín ndiya sa tjunihnga rë xitjë xcun nangui vëhë xi chaja sa cuechu nixtin rë nu xi nihñaa jyë nihñaa hnga Nina. Hane hya xi chja me chji rë sehe sua nai rë nangui jan cahndë xi sahmixa nahmi jan cojo nangui vëhë. O sa tsajin ne, cuechji me sacuatjin vengui chji rë nangui vëhë peru cuesuntaha sa me chji rë nangui sehe cuma cuejña cojo me nangui. Nangui vëhë ne, cuya nga cojo nai tjun rë hya xi cuisehen nu xi nihñaa jyë nihñaa hnga Nina, nu xi hmi rë Jubileo.

Tjin xcusun xi cumajin cjue cjuatjo xcun Nina ta, tsëhë xi ha tsëhë me vëhë. Xcusun xi ha tsëhë me jan ne, hacui quihndi tjun rë jima ngu chu cojo ngu cahndë tsëhë të cahndë tsëhë tutjë xi tunihnga rë, cojo ngu cahndë tsëhë të cahndë sacuatjin chji rë chu. Xuta xi ha cachja Nina xi cueya me ne, sá presu xi casahmi me cjuatsehen o sa presu xi cafaha xuta ngajñi ngu si ne, machjiriin me tsëhë ngu cjuatjo. Cumajin sehenndaya me; hacuiin xi cuechji me tujún, hacuiin xi tsiquehen me ngu chu cahndë rë xi cueya suva me.

**Cachja Nina xi scunihnga Moisés ngu censu cojo sa xi
 vëë me há cjín má xuta xihin tsëhë jima ngu ndihya
 xuta tjë rë Israel, sehe tsingacun me jima ngu ndihya
 jan jarë ladu cjue cuiyuju cahndë me ndihya tsjian rë
 me cojo sa xi chichihin cuetju**

(Números 1-2)

Hya xi cavatju ngu nu xi cavanga xuta tjë rë Israel tsëhë nangu Egipto ne, cachja Nina cojo Moisés cojo Aarón xi meje rë xi scunihnga me ngu censu xi vutsejen me há cjín má xuta xihin tsëhë jima ngu tjë rë tejo ndihya xuta tjë rë Israel xi tjin o sá há cjín má xihin xi má sindadu. Hacuaha cavaxijin me ngu cha xi cumatitjun tsëhë jima ngu ndihya xuta xi cuacun vë cojo sa xi cuisecoo cha me. Hya xi camá ne, me xi camatitjun jan ne, cavexqui me yëjë cha xi can nu tjin rë cojo xi cjuiniji sa. Ndihya xuta jan ne, má me xuta tjë rë me xi cuicun vi: cha Rubén, cha Simeón, cha Judá, cha Isacar, cha Zabulón, cha Efraín, cha Manasés, cha Benjamín, cha Dan, cha Aser, cha Gad, cojo cha Neftalí. Yëjë ni xihin tsëhë ndava xuta jan cavexqui me. Suva xihin tsëhë ndava xuta tjë rë cha Leví, xihin vëhë cavexquiin me ta há tjin xa xi satë rë me. Hane xi yëjë xuta

xihin jan ne, jyun cientu mil cojo jyan sa mil cojo hñu cientu vasen má me.

Cachja Nina cojo Moisés xi xuta tjë rë Israel ne, hya xi cjue ndiya me ne, meje rë xi tiña yungun tsjian rë Nina cuiyuju yéjë ni me. Sacuaha yungun tsjian jan ne, taha xcun ne, meje rë xi taha ladu vetjucaa tsuhi scutsejen, hane ladu vëhë ne, tjun satë rë cahndë xi cuiyuju ndihya rë xuta tjë rë cha Judá sehe ndihya rë xuta rë cha Isacar, sehe ndihya rë xuta rë cha Zabulón. Hacuaha hora xi tsujihiya me cjue me jingu sa cahndë cuatjin chichihin ni cjue me cojo cahndë rë me ta tjun cjue cha Judá, hane sehe cuisatjehnga tjengui me yéjë yahnga xuta ndava tjë jan tucuntjin satë rë me cahndë. Sehe taha ladu quixi tséhë yungun jan ne, ngajan cuiyuju ndihya xuta tjë rë cha Rubén, sehe tséhë cha Simeón, sehe tséhë cha Gad. Hane cha xi cuacun vë ne, majo cha cuetju cha cjue cha. Sehe taha ladu vetje tsuhi jan ne, taha vëhë cuiyuju ndihya rë xuta tjë rë cha Efraín, cojo tséhë cha Manasés, cojo tséhë cha Benjamín. Hacuaha chuva vëhë cuma tjengui cha xi cuetju cha cjue cha. Sehe taha ladu scun tséhë yungun jan ne, ngajan cuiyuju ndihya rë xuta tjë rë cha Dan, sehe tséhë cha Aser, sehe tséhë cha Neftalí. Hane

cha xi cuacun vëhë cumatjengui camaha ni cha xi cuetju cha cjue
cha.


**Cavaxijin Nina yëjë cha xihin rë ndihya xuta rë Leví xi
cuisecoo cha nahmi xi ha camá cavaxijin me**

(Números 3-4; 7-8)

Nixten xi cavanga yëjë xuta tjë rë Israel tsëhë Egipto ne, cachja Nina cojo rë me xi jimangu quihndi tjun rë jimangu ndava me ne, tsëhë Nina má. Cuatjin cachja me ta catsiquiin me quihndi xi cuacun jan hya xi catsiquehen me quihndi tjun rë xuta egipto. Sehe hya xi siu xuta tjë rë Israel ngajan ndetjun Sinaí jan ne, cachja Nina cojo rë me xi cjuaha me xihin tjë rë Leví sá changá me sá chihndë me cahndë rë xi cjuaha me xihin xi quihndi tjun rë yëjë xuta tjë rë Israel. Hane xuta tjë rë Leví jan ne, Levita hmi rë me. Moisés cojo Aarón cojo yëjë nahmi ne, hacuaha Levita má me. Casua Nina xa xuta Levita jan xi cuiuscoo me Aarón, nahmi xi matitjun hacuaha cuiuscoo me nahmi xi yahnga o sa xuta tjë rë Aarón xi sahmi me xa rë yungun. Peru sacuaha cjuatjo xi sua xuta xcun Nina ne, suva Levita xi hacuaha má nahmi xu cuma sua me cjuatjo vëhë xcun

Nina. Xa xi sahmi xuta Levita jan ne, xa xi sahmi me cuidadu rë cojo sa xi cuaniji me ya cojo tsjian cojo xcusun rë yungun tsjian hya xi cjui me ndiya, hane sehe vinchacoo xicjin me cojo sa xi cuejñandaja nga hya xi cjuehe me ngu cahndë.

Nima Leví ne, casacu rë me jyan nixti xi xihin xi cuitjin hmi rë: cha Gerson, cojo cha Coat, cojo cha Merari. Hane ngajñi rë xuta tjë rë cha Coat ne, tacun Moisés cojo Aarón cojo yëjë sa nahmi xi yahnga (ta tjë rë Aarón má nahmi). Sacuaha Levita xi tjë rë Coat Peru xi hacuiin tjë rë Aarón má me ne, me vëhë cavaniji me ngasunscun cojo yëjë sa xcusun xi sahmixa cahntsua cahndë ximinchacun rë yungun jan. Hane sacuaha Levita xi tjë rë Gerson ne, me vëhë vaniji me yëjë cortina rë yungun tsjian jan cojo yëjë xcusun xi setsa rë rcu yungun jan. Hane Levita tjë rë Merari ne, me vëhë vaniji me yëjë yatë cojo yëjë yanduju rë yungun jan.



Esta ilustración
no está
disponible.

Sehe ngu jo nga me xi jemu matitjun tsëhë ngu nga ndihya xuta ne, handasa hacuiin xuta Levita má me, cjuaha me jyun carreta cojo jyun ninchin ndyaja xi scavë chu carreta jan. Hane sahmi me entregadu carreta jan cojo xuta Levita, cojo sa xi xuta Levita ne, sahmixa me cojo tsëhë mé xi cuaniji me xi hai. Ñuju carreta jan ne, satë rë xuta tjë rë Merari ta yatë xi yaniji me ne, jercu hai camaha ni. Hane carreta xi jo sa jan ne, satë rë xuta tjë rë Gerson. Xuta tjë rë Coat ne, casatiin rë me carreta ta tsëhë xi xcusun xi yaha me ne, jemu xcusun ximinchacun camaha ni, vëhë xi cachja Nina cojo rë me xi cuisehen ya cahntsua ngojo quicha xi yaha sehe cuma cuesuntya xuta ya jan xi cjue cojo me, peru cuetahatsjaain me.

Hane xi cuisehen xuta Levita xa jan ne, meje rë xi cumatyjahi me cojo cjuatacun rë me xcun Nina, vëhë xi casua me cjuatjo xcun Nina xi hatuxa tsëhë, cojo sa xi tsejen xi hisca nixtin hya ni ne, cjuenduju cuisecoo me xcun xa rë Nina. Catsiquehen me jo ndyaja xi cama cjuatjo jan. Ngu chu vëhë ne, casua me sacuaha ngu cjuatjo tjinchihin, hane ngu nga chu ne, casua me tsëhë jyê rë me.

Hya xi caviyujucahndë xuta tjë rë Israel ne, xuta Levita ne, caviyujutaha ndee rë yungun jan, hane hitsë sa cjín tséhë ne, caviyuju yahnga xuta tjë rë Israel ndava me. Moisés cojo Aarón cojo me xi má nahmi ne, cahndë xi ladu vetjucaa tsuhi tséhë yungun jan ne, ngajan casatë rë me xi catsindaja me ndava tsjian me tiña hiscan tu cuiseen ni yungun. Hane yahnga sa xuta xi tjë rë Coat má me ne, catsindaja me ndava me taha ladu vetje tsuhi tséhë yungun jan. Hane xuta tjë rë Gerson ne, caviyuju me ndava me taha ladu quixi tséhë yungun rë Nina jan, hane yëjë xuta tjë rë Merari ne, catsindaja me ndava me taha ladu scun tséhë yungun jan.

Cachja Nina cojo Moisés tséhë xuta xi sahmi promesa xi hmi rë promesa tséhë xuta nazareo

(Números 6; 30)


Cachja Nina cojo Moisés mé xi meje rë xi sahmi xuta xi chja me xi ngu nazareo cuma me ta meje sahmi me suva ni xa rë Nina handasa cahntsua ngu jo nixtin o sa yëjë nixtin xcun cjuahñu rë me. Tjin jyan xcusun xi cumajin sahmi me cahntsua nixtin xi tisahmi me suva ni xa rë Nina. Cumajin cuihi me vinu, hacuaha cumajin sinë

me uva. Cumajin sejnu rë rcu me. Hacuaha cumajin sahmi tiña me tsëhë ngu nima handasa jemu tiña xuta rë me ta, sa xi cuatjin sahmi me ne, cuma chojyihi yojo rë me xcun Nina. Xuta xi cuacun vë ne, yëjë nixtin xi sahmi me xa rë Nina ne, meje rë xi tyjahi me cojo cjuatacun rë me xcun Nina. Hane sa xi tjin ngu nixtin xi sahmi me ngu xcusun xi tsavi cojo ne, cuetsihin nga me sahmi me ngu ndiya xatsë sacuatjin promesa xi casahmi me cojo Nina.

Hane hya xi cuijnetaha nixtin rë promesa rë me ne, meje rë xi cjuecojo me ngu chu tsánga sacuaha ngu cjuatjo xi tjinchihin. Hane ngu nga chu tsánga chjuun xi cuaha me ne, vëhë tsëhë jyê rë me, hane ngu nga chu tsánga xi cuaha me ne, vëhë tsëhë ngu cjuatjo xi sinë tangun me, hacuaha cojo niñu sua me. Hane ngu nahmi jan ne, sua me yëjë cjuatjo vëhë cojo Nina. Hya xi camá ne, ha cahndë xi tu cuiseen ni yungun ne, xuta xi casahmi me promesa vë cojo Nina jan ne, meje rë xi xti tsjarcu me xincha tangun xcun ndihi cojo xi vangui tsëhë cjuatjo xi jinë tsë tsë me jan. Ngajan xi nahmi jan ne, sua me ngu rqui tsëhë ñuju rqui yojo xi cachjan tsëhë chu tsánga jan, chu xi catsiquehen xuta jan sacuaha ngu cjuatjo xi sinë tangun me hacuaha cojo hitsë niñu ne. Sua nahmi jan viyujusun tsja xuta jan;

hane xuta jan ne, sua me cojo Nina cjuatjo vëhë sacuaha ngu cjuatjo xi hatuxa tsëhë compromisu xi casahmi me cojo Nina jan. Ngajan xi xuta jan ne, sua me nahmi ngu rqui tsëhë ñuju rqui taha ladu quixi ma majo tsëhë yojo rë chu jan cojo ndanisin rë chu, sacuatjin sahmi me cojo cjuatjo xi jinë tangun me. Hane xi cafë casahmi me yëjë xcusun vëhë ne, vëhë cajnetaha compromisu xi casahmi me cojo Nina, hane xuta jan ne, cuma cuihi nga me vinu.

Hya xi camá ne, yo xi hacuaha meje sahmi ngu xcusun compromisu vëhë cojo Nina ne, meje rë xi sahmi yëjë ni xcusun hacutjin xi meje rë Nina xi sahmi, o sa tsajin ne, cuichja Nina tsëhë xi cuatjin choho casahmi ta casahmichiin compromisu rë cojo Nina. Sa xi ngu chjuun sahmi na compromisu xi cuacun vëhë ne, peru nahmi rë na o sa xi xihin rë na ne, chja me ta hacuiin ngujyë xi sahmi chihin na compromisu vëhë ne, tsinchataha Nina na hane hacuiin ngujyë sahmi na. Peru sa xi xihin rë na o sa xi nahmi rë na cuichja me xi ndatjin o sa xi ha vëë me tsëhë xcusun vëhë peru chjaain ni me ne, ngajan xi chjuun jan ne, tjin rë na xi sahmichihin na compromisu vëhë.



Esta ilustración
no está
disponible.

Cavetjuxin yëjë xuta tjë rë Israel tsëhë ndetjun Sinai xi cjue me ngajan Canaán

(Números 9:15-10:36)

Hisca nixtin xi tjun tjun camandaja yungun rë Nina ne, canduva
ngu yufi cavetsa rë xi nguinxitin. Hane xi nguixun ne, canduva ngu
ndihi setí ndajyihì xi casuahasen hiscan tacun yungun jan. Xuta tjë

rë Israel jan ne, ha vëë me xi cumajin cuetju me cjue me jinguyëjë rë xi tacun cuaha yufí jan rcu ndava Nina jan. Hane hora xi cuiniya yufí jan xi cjue ne, xuta tjë rë Israel ne, hacuaha tjengui me cjue me taha ngaxtun yufí jan. Nixtin can tsëhë xi majo sa jan ne, hitsë ni quisuntaha tsëhë xi ngu nu hya xi cavetju me tsëhë Egipto jan ne, camijihnga yufí tsëhë rcu ndava Nina jan. Ngajan xi xuta tjë rë Israel jan ne, cavetsihin cavetju me quiji me. Titjun ngu ndihya xuta tjë rë Judá cojo Isacar cojo Zabulón cavetju me quiji me. Xi cavatju nga me vëhë ne, sehe cavetju xuta Levita me xi cavaniji yatë cojo cortina jan. Hane tjengui ngu ndihya xuta tjë rë Rubén cojo Simeón, cojo Gad. Ngaxtun me xi cuacun vë ne, ngajan nduva sa xuta Levita, me xi yaniji yëjë xcusun xi sahmixa cahntsua ndava Nina jan. Cuatjin chuva vëhë ne, xi cjuehe ndava Nina jan ne, ha cuma casehencojo, ha tjichine xi cjue cuiyuju ngu tsë ngu xti xi sahmixa cahntsua yungun jan. Hya xi camá ne, sehe cavetju ngu ndihya xuta rë Efraín cojo Manasés, cojo Benjamín. Cajnetaha camaha ni ne, sehe cavetju ngu ndihya xuta tjë rë Dan cojo Aser, cojo Neftalí.



Esta ilustración
no está
disponible.

Jo ndiya camacjan rë xuta tjë rë Israel cojo Nina

(Números 11)

Jemu chuva nixtin jan ne, tsëhë xi jemu chja yëjë xcusun xi tivatju me tijimá ne, xuta tjë rë Israel ne, jemu cachjataha me tsëhë. Vëhë xi camacjan rë Nina cojo rë me ne, catsingatju me ndihi xi cavetsihin ngu ladu cavaca rë ndihya tsjian xi tsëhë me. Hya xi camá ne, xuta jan ne, quiji cachja me cojo Moisés xi catjehya me favor cojo Nina ne, catitsicoh me ndihi jan. Hane xi quiji cachja Moisés cojo Nina ne, catsicoh me ndihi jan.

Xi cavatjun nixtin jan ne, xuta tjë rë Israel jan ne, xi casengui rë
 me xi jinë me scuan rë mana ne, cama meje sinë me xcusun xi cajinë
 me titjun ngajan Egipto. Hane cavetsihin cachjataha nga rë me.
 Hane Nina ne, hacuaha camacjan rë me cojo rë me xi jemu cjuaxti
 me. Hisca cojo Moisés ne, hacuaha camacjan rë me cojo rë me.
 Sehe cachja Moisés cojo Nina xi ha quihndë scaain rë me xi
 cjuenduju me cjuahacuenda me xuta xi cuarcu cjín me. Hane
 cafehya me favor cojo Nina xi sua me yo xi cuisecoo rë me. Ngajan
 xi Nina ne, cachja me cojo Moisés xi catisahmitangun me jyanchan
 të xuta changá, hacuaha casua Nina cjua rë me xi sua me cjuatacun
 xuta xi cuacun vë cojo sa xi cuma sahmi me xi cuisecoo me Moisés.
 Hacuaha cachja Nina xi sua me yojo sinë xuta tjë rë Israel ngu sa
 jingu, hisca xi cuma cjuenda rë me sinë me yojo vëhë. Peru Moisés
 ne, macjaain rë me xi ma tsingatju Nina jemu cjín yojo xi sinë xuta
 ta jyun cientu mil má xuta ne, sehe cuitjin cachja Nina:

—Chutsijin ta ngahan ne, hatuxa cuma sahme tu mé ni xcusun.
 —Cuatjin cachja me.



Cuatjin camá xi Moisés ne, casahmi tangun me jyanchan tē xuta changá, hane Nina cavisecoo rē me xi jemu ndaja cavechutaha cjuatacun rē me cojo sa xi cuma cuisecoo me Moisés. Ngajan xi Nina ne, catsingatju me chuva ndiya nduju rē nisē xi hmi rē xahnda nguijña xi jemu nangui vitjen chu hiscan siu ndihya tsjian jan. Yëjë ni xuta ne, cafaha me nisē jan catsiquehen me chu sehe catsixi me yojo rē chu. Peru tséhë xi cjan rē Nina tséhë xi cachjataha me

hacuaha jemu cjuaxti xuta jan, catsingatju me ngu chíhin jingujyë ni.
Hane jercu cjín xuta camahmu rë me ne, cahme me.

Sahmixin María cojo Aarón tséhë Moisés

(Números 12)

Sehe tiña nixtin xi catsingatju Nina chu xahnda nguijña jan ne,
María cojo Aarón ne, choho cachja me tséhë Moisés hntsë me. Me
xi cuacun vë ne, chuyiin rë me tséhë na jma xi cavixan cojo Moisés
jan, hacuaha tichja me xi suva Moisés casahmi jyë hnga me yojo rë
me xi cuma rë yëjë sa xuta. Peru cjua vëhë ne, quixiin ta Moisés ne,
jemu tsinguijne me yojo rë me. Hane tséhë xi Nina ne, ha vëë me
cjua xi tichja María cojo Aarón jan ne, cavitexa me xi cjue me cojo
Moisés ngajan yungun. Hya xi camá ne, ngajan cacjan Nina cojo
María cojo Aarón xi cuatjin choho cachja me tséhë Moisés.

Hacuaha cachja Nina xi xcun cojo xcun cuichja me cojo Moisés ta
tséhë xi, xi cuma rë Nina ne, Moisés ne, hangu xcusun sahmi me xi
cuma rë yëjë sa xuta. Ngajan xi Nina ne, casahmi me castigu na
María, casahmi me xi jemu cavetju rë na nindu xi casatë rë ngu
chíhin xcun chuxin rë na. Moisés ne, cafehya me favor cojo Nina xi

sahmi me xi cumandaja na, hane Nina ne, cuatjin casahmi me. Peru cachja Nina xi ngu castigu xi sua me na ne, tsingatju me na ngajan ngu xin camahani ni tsëhë xuta cjín jan, cuejña na ngajan ngu totje camaha ni.

Esta ilustración
no está
disponible.

Catsingatju xuta tjë rë Israel tejo xihin xi cjue

scutsejensun ngajan nandya Canaán

(Números 13-14)

Hane cafë totje jan ne, cavisehen nga na María cahndë xi siu yahnga me, cavetju yëjë me quijixin me tsëhë cahndë jan, hane cafehe me ngajan nandya Parán. Hane ngajan cachja Nina xi

tsingatju Moisés tejo xihin, ta cuaxijin me ngu ngu xihin jan tséhë jimangu ndihya tjë rë Israel xi tejo jan, cojo sa xi cjue scutsejensun me nandya Canaán. Ngajan xi Moisés ne, catsingatju me xuta jan, hacuaha cachja me cojo rë me xi cjuahacuenda me, mé xcusun cún xuta jan. Hacuaha catjaha cuenda me, mé xcusun cún nangui ladu vëhë, ¿há ndacun nangui xi cuma xitjë?

Ngajan xi xuta jan ne, cavetju me quiji me, hane cavuya me hisca xi cafë yachan nixtin. Hane xi cafehe me ne, casuacuenda me yëjë xuta tjë rë Israel jan yëjë xcusun xi cavëë me. Cachja me ta, nangui xi tjin ladu vëhë ne, jemu ndaja camaha ni xi cuma tu mé ni xitjë, peru sacuahatjin xuta xi siu jan ne, jemu hñu ngahñu rë me, hacuaha yahnga me ne, jemu hnga camaha ni me. Hacuaha nandya rë me ne, jemu ndaja cuidadu tjin. Vëhë xi jemu tsavi má me. Cuatjin cachja yahnga me. Ngu tutu ni Josué, ngu xuta tjë rë Efraín cojo Caleb, ngu xuta tjë rë Judá ne, jo me vëhë cachja me xi ndatjin xi yëjë ni xuta tjë rë Israel ne, cjuenduju me sacuatjin cavyuju me cjuatacum rë me. Hane cjue cjuaha xicjin me cojo xuta ladu vëhë, ta xi má rë me ne, Nina cuisecoo rë me. Peru me xi të sa jan xi hacuaha quiji cavutsejensun me ne, catsingatahacacun me xi tsajin

rqui rë ta xi má rë me ne, tsajin nixtin xi cuma xi meje rë xuta tjë rë Israel cojo xuta ladu vëhë. Hane yëjë ni xuta ne, cavetaharcu me cjuava xi cachja me xi të jan, cahndë rë xi cuetaharcu me cjua xi cachja Josué cojo Caleb. Sehe cavetsihin camacjan rë xuta cojo Moisés cojo Aarón. Cachja me ta hitsë sa ndaja tsëhë me sa xi caviyuju cahndë me ngajan nandya Egipto. Hisca cavetsihin cachja me xi suaxa me ngu xuta hacjahi xi cumatitjun xi cuya cjuecojo rë me ngajan Egipto.

Ngajan xi cachja Nina cojo Moisés ta sahmi me xi cueya yëjë xuta tjë rë Israel jan, hane sahmi me xi suva xuta tjë rë Moisés ne, cuejña nga me ngu nandya. Jemu camacjan camaha ni rë Nina cojo xuta jan tsëhë xi handajasa xi jemu casahmi Nina cjuarcun ngatsë rë me ne, cojo yëjë sa ne, camacjaain rë me xi sua Jain Nina me nandya Canaán. Peru Moisés ne, cachja me cojo Nina ta sá xi tsiquehen me xuta tjë rë Israel ne, cumachaya rë xuta egipto. Hane hya xi camachaya rë me ne, cuichja me ta Nina ne, tsajin rë me ngahñu. Cuichja xu me xi ngatsë rë xi cumajin sua me Canaán xi cuma tsëhë xuta tjë rë Israel, vëhë xi catsiquehen Nina yëjë xuta. Sehe Moisés

ne, cafehya me favor cojo Nina xi tsinchataha me xuta tjë rë Israel jan ngu ndiya sa. Hane Nina ne, cuitjin cachja me:

—Ndatjin, peru quihndë tsajin cahndë xi ngutjen cuisehen me nandya jan, vëhë xi sahme xi cjue sa me cahntsua xi yachan nu ngajan hiscan xin camahani vë. Hane cahntsua yachan nu vë ne, yëjë xuta xi camacjaain rë mé xi cachjá xi suá rë me Canaán ne, cjuë me cueya me. Suva Josué cojo Caleb cuyuju me cjuahñu xi sacu cahndë cuyuju me ngajan Canaán. —Cuatjin cachja Nina.

Cuatjin camá xi Moisés ne, cachja me cojo yëjë xuta jan sacuatjin cachja Nina cojo rë me, hane yëjë xuta jan ne, jemu choho camá rë me. Sehe ngajan xi cavindeya cjuatacun rë me caviyujucacun me xi cafaha xicjin me cojo xuta Canaán. Peru Nina ne, cavisecuaain rë me, hane cacaain rë me cojo xuta xi cuacun jan. Cuatjin camá ta tsëhë xi cavejñacacun Nina xi tsuyihiya xuta xi cuacun jan ngajan ngu xin camaha ni cahntsua xi yachan nu.

Cha Coré cojo cha Datán cojo cha Abiram camacjan rë cha cojo Nina, miji cuihndë cha tsëhë me

(Números 16-17)

Ngu cha xi hmi rë Coré ne, cachja cha ngu nixtin jan xi ha quihndë miji sa cuetaharcu cha cjua xi chja Moisés. Cha Coré jan ne, tjë rë Coat quihndi rë Leví má cha, sacuatjin rë Moisés. Cha Datán cojo cha Abiram, ladu tjë rë Rubén má catsijo cha. Hya xi camá ne, catsijo cha vë ne, camatangun cjuatacun rë cha cojo cha Coré hane hisca cojo sa jo cientu vasen xuta xi matitjun me hacuaha camatangun cojo cha Coré. Sehe quiji cavisiajmi me cojo Moisés cojo Aarón. Ngajan xi cavinchajyë cha me tsëhë xi cafahaxa suva me xi cuacun vë, vëhë xi vitexa me yëjë sa xuta tjë rë Israel. Ngajan xi Moisés ne, cachja me ta, xi cuma nchujun jan ne, sehe cuichja Nina yo xi cavaxijin me xi casuaxa me xi sua cjuatjo xi yaha xuta xi cuma tsëhë Nina. Hya xi camá ne, sehe cacjan Moisés cojo cha Coré tsëhë xi handasa cha vëhë ngu xuta Levita xi cavaxijin Nina xi cuaniji yëjë xcusun xi sahmixa cahntsua yungun rë me ne, manguaaincacun sa cha cojo cjuatacun vëhë, ta xi má rë cha ne, hacuaha cojo cha cumá cha nahmi. Ngajan xi Moisés ne, cajindaya

me cha Datán cojo cha Abiram, peru cha xi cuacun jan ne, quiijiin cha. Catsingatju ni cha cjua tséhë Moisés xi me vëhë ne, cavindacha me xuta xi cachja me xi sacu rë me ngu cahndë xi jemu ndajyihu xi cuiyuju cahndë me. Cahndë rë vëhë ne, tu ngu nangui hiscan xin camaha ni tsuyihya ni me. Hacuaha cachja sa cha xi Moisés ne, tsajin rë me chuva rë xi cuetaha suva me yojo rë me xi me vëhë cuitexa me cha.

Xi cama nchujun jan ne, cachja Moisés cojo cha Coré xi sahmi tangun cha yëjë xuta cjin jan xi tjin tangun cjuatacun rë xi miji cuihndë cjua rë Moisés. Sehe cumatangun cojo xuta jan ngajan hiscan tingotjo yungun rë Nina. Hacuaha catjaha jima ngu me jan tyjungunsa xi cuaca me xcun Nina cojo ngu xcusun hiscan xi cuetiyyá. Hane me xi cuacun jan ne, cuatjin quijicojo me xi sahmi me. Hya xi camá ne, Nina ne, cachja me cojo xuta xi yahnga jan ta cjin xinchacun me tséhë ndihya tsjian jan hiscan ndava cha hngacacun xi jyan jan. Ngajan xi Nina ne, casahmi me xi caxyusehen nangui hiscan hinchacun cha cojo yëjë xuta rë cha, hane ngajan cavixuya cha xi cuacun vë cojo yëjë xuta rë cha cojo yëjë xcusun xi tséhë cha. Hya xi camá ne, tséhë ngahnga catsingatju

Nina ndihi xi quiji cavaca rë caxa ximinchacun xi hincha yungun hacuaha cojo xuta xi jo cientu vasen xi tivaca tyjungunsa jan café me cati me. Cuatjin camá xi cojo cjuatacun vëhë ne, catsingacun Nina xi cavaxijin me Aarón xi cumatitjun me tsëhë yëjë ni nahmi.

Xi cama nchujun jan ne, cavetsihin xuta cachjajyë me ta tjin xi cun rë Moisés cojo Aarón ta ngatsë rë me vëhë xi cuatjin cahme xuta jan. Vëhë xi camacjan rë Nina cojo xuta vëhë, cavetsihin xi tsiquehen me yëjë ni. Ngajan xi Moisés ne, cachja me cojo Aarón xi cuaca me tyjungunsa ngajan ngajñi rë xuta jan, hane Aarón ne, cuatjin casahmi me. Cojo vëhë cajñetaha xi casahmi Nina castigu xuta, peru ha cahme sacuaha teñuju mil xuta.

Hya xi camá ne, cachja Nina cojo Moisés xi cjuaha me ngu yaxti xi tsëhë jima ngu ladu xuta tjë rë Israel, hane catitsihindu me xcun ñihi rë xihin xi hitsë sa jemu matitjun camaha ni tsëhë ndihya tjë rë xuta jan. Ngajan xi ñihi rë Aarón ne, catitsihindu me xcun yaxti xi tsëhë ndihya xuta tjë rë Leví. Hya xi camá catsihindu me ñihi jan ne, sehe cachja Nina cojo me xi cuiyujutaha me yaxti jan cahntsua yungun rë Nina, ngajan cahntsua cuartu ximinchacun.

Ngajan xi yaxti xi tsëhë xihin xi cavaxijin Nina xi cuma nahmi jan ne, cuiyujutaha rë me xca. Ngajan xi Moisés ne, cachja me cojo xuta tjë rë Israel jan sacuatjin cachja Nina cojo rë me. Hane jima ngu ndihya tjë rë xuta ne, quijicojo me ngu ngu yaxti. Hane Moisés ne, quiyi cavyujutaha me cahntsua yungun rë Nina jan. Hane xi camá nchujun jan ne, vutsejen me xi yaxti xi quitaha ñihi rë Aarón jan ne, hacuiin suva xca ni yaja rë ta hacuaha cavaqui rë naxu hacuaha cavaqui tu rë. Hane Moisés ne, quijicojo me yëjë xi tejo yaxti jan candatsen cojo sa xi xuta tjë rë Israel jan ne, scuëë me cojo tuxcun me. Sehe cachja nga Nina cojo Moisés xi cjue cuejña nga me yaxti xi tsëhë Aarón jan cahntsua yungun jan. Cuatjin camá sacuaha xi tisua Nina ngu seña cojo sa xi jimachaya rë tu yo ni xuta xi meje cumacjan rë me sa xi hacuiin nahmi má me. Cuatjin camá xi Moisés ne, quiyi cavejña nga me yaxti jan cahntsua yungun.

Ngu ndiya xi cavetahacuaain Moisés cojo Aarón tsëhë Nina

(Números 20:1-13; 22-29)

Yëjë xuta tjë rë Israel jan ne, cafehe me ngu cahndë naxi hiscan xi hmi Cades, hane ngajan ne, tsajin camaha ni nandá xi cuihi me. Ngajan xi xuta jan ne, cavetsihin cachjataha rë me cojo Moisés. Hane cuitjin cachja me:

—Hitsë sa ndaja sa xi catsiquehen tangun ni naja me ngayejen ni cojo cha Coré, cojo cha Datán, hane cojo cha Abiram. Ngayun ne, tu mahya xi canaxun naja ngajan Egipto, ta nangui vihi ne, tsajin camaha ni mé xi mayehe, hatuxa jemu quixi camaha ni nangui. Hacuaha hisca nandá tsajin xi siuun. —Cuatjin cachja me.

Ngajan xi Moisés cojo Aarón ne, quiji me taha hiscan xi cuiseen yungun tsjian jan, hane ngajan cachja Nina cojo Moisés cuitjin:

—Tihin cojo baston riji, hane sehe ngaye cojo Aarón ne, nihñutangun yëjë ni xuta. Hane sehe tinoje cojo naxi, hane sehe cuetju nandá tsëhë naxi jan. —Cuatjin cachja Nina cojo Moisés.

Ngajan xi Moisés cojo Aarón ne, cuatjin casahmitangun me xuta, hane Moisés ne, cjan cachja me cojo xuta jan cuitjin:

—Ngahan ne, hatuxa hveen mé má cuatjin tjin ná xi cuaxê nandá xi hyun tséhë naxi vihi ta ngahan ne, ha hvë ta ngayujun ni ngayun ne, ijemu hngatacun camaha ni ngayun!



Hane sehe quiji me cavaja me nixin jan jo ndiya. Hya xi camá ne, cavetju nandá tséhë naxi jan, hane casacu nandá cahvi yëjë xuta hacutjin xi meje rë me. Hacuaha hisca cojo chu rë me cahvi yëjë chu. Peru Nina ne, camacjan rë me cojo Moisés cojo Aarón tséhë xi

mé má cuatjin cavihndiin me tséhë Nina. Xi cavitexa Nina ne, cachja me cojo Moisés xi cuichja Moisés cojo naxi, hane cahndë xi cachja me cojo naxi ne, cachja cjan me cojo xuta, sehe quiji cavaja me naxi jan. Véhë xi Nina ne, cachja me cojo Moisés cojo Aarón xi cjuiincuajin me xuta hisca cuisehen me ladu tséhë Canaán, ta ha chaja sa cuisehen xuta nangui vë, ngajan nangui quixi ni, cueya catsijo me. Hane jemu chuva nixtin jan ne, hya cahme Aarón. Hane Eleasar, quihndi tjun rë Aarón ne, cafaha xa rë me, camá titjun me tséhë yéjë ni nahmi.

**Tséhë xi camacjan rë xuta tjë rë Israel vëhë xi
catsingatju Nina chu yë xi cjuaha rë me**

(Números 20:14-21; 21:4-9)

Xi meje yachan nu xi catsujiyhiyasun xuta tjë rë Israel ngajan nangui quixi ne, cavetsihin camacjan nga rë me tséhë Nina cojo tséhë Moisés. Cjan rë me ta handasa xi hincha ndiya me xi cjui me ladu rë Canaán, peru tjin rë me xi cjuaha me ngu ndiya xi hitsë sa cjin ta tséhë xi xuta tjë rë Edom xi quihndindai cjin rë Esau, (me xi hntsë Jacob), miji sua me cahndë xi cuatju xuta tjë rë Israel ladu rë

me. Ngajan xi xuta tjë rë Israel ne, jemu jima cjan rë me tsëhë xi xin camaha ni tifi me, hane tsëhë xi fenda rë me jinë me suva mana.



Hane ngatsë rë xi cuatjin xcusun rë xuta jan ne, jemu catsingatju Nina chu yë xi cjuaha chu me ngajan hisca caviyuju ndihya tsjian rë me. Ngajan xi jemu cjín xuta cafaha chu me, hane cuatjin cjín me cahme me xi cafaha chu me. Hane tsëhë xi cavacun rë xuta xi Nina

catsingatju me chu yë jan xi sua me cjuañihi xuta jan tsëhë xi
 camacjan rë me tsëhë Nina ne,
 quiji cachja me cojo Moisés xi
 cuichja Moisés cojo Nina xi
 cuaxëxin me chu yë jan. Hane
 Moisés ne, joho cachja me. Quiji
 Moisés hane cachja Nina cojo rë
 me xi tsindaja me ngu yë tsëhë
 quicha sinë, sehe catetaha me chu
 rcu ngu ya hnga cojo sa xi tu yo ni
 xuta xi faha chu yë me ne,
 scutsejen me chu yë quicha jan,
 cojo sa xi cuma cuetjutje me ne, cumandaja me. Hya xi camá ne,
 catsindaja Moisés ngu chu yë quicha sine, hane jemu cjín xuta xi
 cafaha rë me yë ne, cavetjutje me camandaja me xi tu cavutsejen ni
 me chu yë quicha jan.



Cacaa rë xuta tjë rë Israel cavaxëtje me yojo rë me tsëhë jo si

(Números 21:21-35)

Xuta tjë rë Israel ne, catsingatju me cjua tsëhë me xi matitjun tsëhë yëjë xuta amorro, me xi siu taha ladu vetjucaa tsuhi tsëhë ndajyë Jordán jan xi sua me cahndë cuatju xuta xi cuacun vë cojo cjuandaja xcun nangui rë me. Peru me xi matitjun jan ne, cachja me ta cumajin. Hya xi camá ne, casahmi tangun me sindadu rë me ne, sehe quiji casahmi me si cojo xuta tjë rë Israel. Ngajan xi xuta tjë rë Israel ne, hacuaha casahmi tangun me sindadu rë me, sehe cavetsihin cafaha xicjin me cojo yëjë xuta amorro. Cacaa rë me cojo si vëhë, hacuaha catsiquehen me xuta xi cuacun vëhë, cafahataha me nangui rë me hacuaha ngajan quiji me caviyuju me. Hya xi camá ne, sehe cavetju me quiji me hiscan nangui xi hmi rë Basán; hane me xi matitjun tsëhë nangui Basán jan ne, casahmitangun me sindadu rë me sehe cafaha xicjin me cojo xuta xi cuacun vë. Ngajan xi Nina ne, cachja me cojo xuta tjë rë Israel xi hacuiin tsacjun me cuma ta Nina ne, hacuanitjin ni cuisecoo rë me xi scaa rë me cojo si xi sahmi xuta Basán cojo rë me. Cuatjin camá xi

xuta tjë rë Israel ne, cacaa rë me cojo si xi casahmi xuta Basán cojo rë me, catsiquehen me xuta xi cuacún vë sehe quiyi cavyuju cahndë me nangui rë xuta xi cuacun jan.

**Fehya me xi matitjun tsëhë yëjë xuta Moab cojo cha
Balaam xi choho cuichja cha tsëhë xuta tjë rë Israel**

(Números 22-25;31)

Hya xi ha cacaa rë xuta tjë rë Israel cojo si xi casahmi yëjë xuta amorrocojo si xi casahmi xuta Basán cojo rë me ne, sehe quiyi me cavyuju me nangui xi hmi rë Moab, nangui xi tacun taha xcun nangui Canaán, nangui ngunda vëhë tsëhë ndajyë Jordán. Hya xi camá ne, xuta moabita ne, jemu catsacjun me xuta tjë rë Israel tsëhë xi jemu cjín camaha ni má me, cojo tsëhë xi ha cacaa rë me cojo jo si yehe.

Ngajan xi me xi matitjun tsëhë nandya Moab jan ne, cajindaya me ngu me xi ma sahmi adivinar, ngu me xi hmi rë Balaam, cojo sa xi choho cuichja me tsëhë xuta tjë rë Israel. Hacuaha camá xi hisca xuta tsëhë nandya Madian ne, ngajan cavetsihin cavisehen me ngu

cjuandaja cojo xuta moabita. Hane hya xi camachaya rë Balaam cjuatacun xi meje rë xuta xi cuacun jan ne, sehe cachja me xi cuiyujuya xuta xi cuacun jan hitsë cojo sa xi cumatsejen mé xi cuichja Nina cojo Balaam. Hya xi camá ne, Nina ne, cachja me cojo Balaam xi cjuiin me xi choho cuichja me tséhë xuta tjë rë Israel ta Nina ne, sahmi me xi xuta tjë rë Israel ne, jemu ndaja camaha ni cuatju me cumá. Cuatjin camá xi Balaam ne, cachja me cojo xuta xi cuacun jan ta cjuiin me.

Ngajan xi me xi matitjun tséhë nandya Moab jan ne, catsingatju nga me ngujo xuta xi hitsë sa matitjun me xi cuma rë xuta xi quiji titjun jan, hane me xi cuacun jan ne, cafehya me favor cojo Balaam xi cjue me. Cachja me xi me xi matitjun tséhë nandya Moab ne, jemu cjín xcusun sua rë me Balaam sa xi cjue me choho cuichja me tséhë yéjë xuta tjë rë Israel. Ngajan xi Balaam ne, cavinenguise nga rë me Nina ¿mé xi ndatjin sahmi me? Hane Nina ne, catsingatihin me xi cjue Balaam, peru suva ni hacutjin xi cuichja Nina cojo rë me ne, vëhë ni xi cuichja me xi cjue me.



Xi cjuaquixi ne, Nina ne, miji rë
 me xi cjue Balaam. Vëhë xi hya xi
 qui ji ndiya Balaam ne, catsingatju
 Nina ngu ángel cojo sa xi suaain
 cahndë xi cjuenduju sa me ndiya jan.
 Balaam ne, quisun me burra rë me
 cjui me. Hane burra jan ne, cavëë
 chu ángel xi secun ndiya; peru me
 vëhë ne, cahviin me. Ngajan xi
 burra jan ne, cavetjuxin chu tsëhë
 ndiya. Hane me vëhë ne, cavaja me
 chu. Ngajan xi ángel jan ne,
 casecunvasen ngu cahndë hiscan xi
 hnga catsijo ladu ndiya jan. Hane xi
 cavëë burra jan ángel xi secun
 vasencia ndiya ne, ña cavetahaniji chu yojo rë chu taha xihndë jan xi
 tivatjutaha chu ángel jan. Hane tsëhë xi jemu cavetahaniji chu yojo
 rë chu taha xihndë jan ne, ña camatë ntsacu Balaam, hane jercu
 cavaja nga me chu. Ngajan xi ángel jan ne, qui ji casecun nga ngu
 cahndë hiscan jemu xcu ndiya. Hane hora vëhë ne, chu burra jan ne,

cafaña chu xi cavëë chu ángel jan. Hane Balaam ne, xi jercu camacjan rë me ne, jercu cavaja camaha ni me burra jan. Hyá xi camá ne, Nina casahmi me xi burra jan ne, cama cachja chu. Hane cavinenguise chu Balaam ta, ¿mé má cuarcu tivaja me chu? Hane cafayangui me cuatjin ta cavaja me chu ta tséhë xi tisahmi chu me sacuaha ngu ngarca. Ngajan xi burra jan ne, cavuya cavinenguise nga chu Balaam sa xi quixi xi xcusun rë chu jan ne, hatuxa hndiin chu tséhë me. Hane Balaam ne, cachja me ta tsajin. Ngajan xi Nina ne, casahmi me xi cojo Balaam ne, camatsejen rë me ángel xi secun ndiya jan yaha ngu quicha. Hane ángel jan ne, cacjan cojo Balaam tséhë xi cuatjin jemu cavaja me chu burra rë me jan. Hacuaha cachja ángel xi canduva cachja cojo Balaam xi cumajin cjue me cuatjin hiscan cjui me. Hane xi cafayangui Balaam ne, cachja me ta hacuaha tjin rë me cjuasua xi cuya nga me ndava me. Peru ángel ne, cachja cojo rë me xi cuma cjue me cojo xuta jan, peru cavuya cachja me xi suva ni cjua xi cuitexa Nina me ne, ha vëhë ni xi cuichja me.

Cuatjin camá xi Balaam ne, quiji me hiscan tacun me xi matitjun tséhë nandya Moab jan, hane xi camá nchujun jan ne, quijiniji me ngu rcu ndetjun. Tséhë ngajan ndetjun ne, jemu ndaja

tsejen jingujyē ni ndihya tsjian hisca xi siu yējē xuta tjē rē Israel. Ngajan xi Balaam ne, cachja me cojo me xi matitjun tsēhē nandya Moab jan xi tsindaja me yatu ngasunscun hane catitsiquehen me ngu ndyaja cojo ngu chu tsánga tsēhē jima ngu ngasunscun jan catisua me cjuatjo cojo Nina. Hane me xi matitjun tsēhē nandya Moab jan ne, cuatjin casahmi me. Sehe cachja Balaam cojo rē me xi cuiyujuya ni me ngajan, hane cjue cuisajmi Balaam cojo Nina hane ¿mé chja me?. Hane xi camacjin Balaam hitsē tsēhē xuta xi cuacun jan ne, sehe ngajan cachja Nina cojo rē me mé xi cuichja me cojo xuta jan. Hane xi cavuya me ne, sehe cachja me cojo me xi matitjun tsēhē nandya Moab jan cuitjin:

—Ngayun ne, caningatjun quijichjaha ná xi choho cuichjá tsēhē xuta tjē rē Israel, peru casuaain ná chuva rē ta tsēhē xi Nina ne, meje rē me xi ndaja cuatju xuta xi cuacun vē. Hacuaha me vēhē casahmi me xi xuta xi cuacun vē ne, jercu cjin camaha ni má me hisca majin ma xqui me. Hisca ngahan ne, meje ná xi cuma ngahan sacuaha ngu xuta xi cuacun vē.

Hane xi cahndë me xi matitjun tsëhë nandya Moab cjua vëhë ne, jemu camacjan camaha ni rë me; peru Balaam ne, cachja me cojo rë me ta suva ni xi cuichja Nina cojo rë me ne, vëhë xi cuma cuichja me.

Ngajan xi me xi matitjun tsëhë nandya Moab jan ne, quijicojo me Balaam ngu nga ndetjun, hane casahmi nga me yatu ngasunscun, hane casua me chu ndyaja cojo chu tsánga sacuaha cjuatjo cojo Nina. Hane hya ne, cachja Balaam cojo rë me cuitjin:



—Chutsujun ni, Nina ne, tsindehyaain me cjuatacun rë me sacuatjin sahmi xuta. Nina ne, cachja me ta me vëhë sahmi me xi

xuta tjë rë Israel ne, hatuxa ndaja cuatju me cuma, hane hatuxa sahmi chihin me. Nina ne, vutsejen me xi xuta tjë rë Israel ne, tsajin camaha ni me xi choho sahmi me, vëhë xi Nina ne, tacun me cojo rë me; tsajin mé cuma rë me handasa xi choho cuichja xuta.

Hane xi cachuyaain camaha ni rë me xi matitjun tsëhë nandya Moab tsëhë cjua vëhë ne, sehe cachja me cojo Balaam xi sa xi cumajin choho cuichja me tsëhë xuta tjë rë Israel ne, ndastu xi cjuiin me ladu rë xuta xi cuacun vë.

Hya xi camá ne, quiji nga me xi matitjun tsëhë nandya Moab jan cojo Balaam ngu nga ndetjun xi majyan, hacuaha catsiquehen me chu ndyaja catsiquehen me chu tsánga. Hya ne, casahmixaain Balaam cojo hisca ngu xcusun xi tjin rë me xi sahmi me adivinar, tsëhë xi vëë me xi cjuatacun xi tjin rë Nina ne, hatuxa xi sahmi me xi ndaja cuatju xuta tjë rë Israel. Hane xi cavutsejen me taha hiscan siu ndihya tsjian tsëhë xuta tjë rë Israel jan ne, cachja Hasen rë Nina cojo rë me mé xi meje rë xi cuichja me. Hane Balaam ne, cuitjin cachja me:

—Nina ne, casua ná me cahndë xi cuma ná ngu njñña xi jemu quixi cuichja cojo ná tséhë xuta tjë rë Israel vë. Xuta xi cuacun vë ne, cuechú nixtin xi jemu jyë ngahñu sacu rë me tséhë xi jemu tivisecoo camaha ni Nina me. Hacuaha cuisecoo Nina me xi scaa rë me cuaxëtje me yojo rë me tséhë si xi sahmi me cojo xuta xi choho vëë rë me. Sua me cahndë xi choho cuatju xuta xi meje rë xi choho cuatju xuta tjë rë Israel vë; peru hacuaha sahmi me xi ndaja cuatju xuta xi meje rë xi ndaja cuatju xuta tjë rë Israel.

Hane xi cahndë me xi matitjun tséhë nandya Moab cjua vëhë ne, jercu camacjan camaha ni rë me sehe catsingatju me Balaam xi cuya me cjue me ndava me. Cachja me xi matitjun jan xi titjun ne, catsingatahacacun me xi sahmi me xi jemu nchina camaha ni cuma Balaam hacuaha sahmi jyë hnga me Balaam, peru hindë ne, sahmii me. Ngajan xi Balaam ne, catsinguitsjen rë me xuta xi matitjun jan xi suva ni cjua xi cuichja Nina cojo rë me ne, vëhë ni xi cuma cuichja me. Cachja sa me cuitjin:

—Nina tisua ná me cahndë xi cuma ná ngu njñña xi jemu quixi camaha ni tséhë xuta tjë rë Israel vë. Vutsejen camaha ni ngu xuta

tjë rë Israel xi tsin me ngu nu xi sehe nduva sa. Me vëhë ne, scaa rë me tsinguijne me cjuatacun rë xuta moabita cojo xuta edomita cojo xuta amalecita cojo yëjë xuta cananeo. — Cuatjin cachja me.

Ngajan xi Balaam ne, cafe me ndava me.

Handasa xi suva xcusun xi ndaja cachja Balaam tsëhë me xi cuma rë xuta tjë rë Israel ne, peru hacuaha cavinchangui me yachjin tsëhë nandya Moab cojo nandya Midian xi cuanguise na chuva rë hacutjin xi choho sahmi xuta tjë rë Israel. Ngajan xi tsëhë xi jemu quicuncacun na yachjin jan ne, quihi cavusehenhyá na xuta tjë rë Israel, hane cachja na cojo me xi cjuecojo na me ngajan hiscan sahmi na suhi xi tsiquehen na chu xi sua na cjuatjo cojo nina ndyojo rë na. Cuatjin camá xi ngujo xuta tjë rë Israel ne, cavetsihin cafaharcun me nina ndyojo, hacuaha casahmi me cjuatseen cojo chjuun rë xuta Moab cojo chjuun rë xuta Midian.

Hya xi camá ne, jemu camacjan camaha ni rë Nina cojo rë me vë xi casua me cjuatjo cojo nina ndyojo jan, vëhë xi cavitexa rë me Moisés cojo ngujo sa me xi hacuaha matitjun me tsëhë xuta tjë rë Israel jan xi tsiquehen me yëjë xuta tjë rë Israel xi cafaharcun nina

ndyojo jan. Hacuaha cavitexa me me xi cjuaha xicjin me cojo xuta madianita xi sahmi me castigu xuta xi cuacun jan tséhë xi cavindacha me xuta tjë rë Israel. Hya xi camá ne, xuta tjë rë Israel ne, casahmitangun me sindadu rë me xi cjuaha xicjin me cojo xuta madianita, hane cacaa rë me cojo xuta xi cuacun jan. Catsiquehen me Balaam, hacuaha catsiquehen me xuta madianita xi xihin hane catsihñu me quijicojo me yachjin cojo langa. Hacuaha quijicojo me chu ndyaja; quijicojo me jingu sa xcusun xi tséhë xuta madianita jan. Hya xi camá ne, sehe quijicojo me xuta xi catsihñu me jan, cojo sa xcusun xi cafaha me jan, quiji cani me xcun Moisés cojo xcun Eleasar me, xi matitjun tséhë nahmi. Peru Moisés ne, camacjan rë me cojo xuta xi cuacun jan xi hacuiin cojo yachjin catsiquehen me ta, tséhë xi na vëhë cojo cjuandacha rë na ne, casahmi na xi ngujo xuta tjë rë Israel cafaharcun me nina ndyojo. Cuatjin camá xi catsiquehen me yëjë na yachjin cojo langa xihin jan, pero na nixti xi tsajin xihin rë ne, catsiquiin me na.

Ngajan xi Moisés ne, catsinguitsjen rë me xuta jan xi camachocun yojo rë me ta tséhë xi caxincha me ngajñi rë nima hane meje rë xi sahmi nga me sacuatjin xcusun xi cavitexa Nina hacutjin

xi cumatyjahi nga yojo rë me. Hisca cojo xcusun rë me jan meje rë xi cuma tyjahi. Tjin xcusun ne, cuma cueti xi cumatyjahi hane yahnga nga ne, cuma cjuengui. Ngajan xi Moisés cojo Eleasar ne, cavatēcja me xcusun xi cachjaha rë tsēhē xuta madianita jan sehe casua rë me sindadu, cojo xuta levita cojo jingu sa xuta.

